

Tupanit nioqqusiat nalunaaqutserneqartarneri pillugit Namminersorlutik Oqartussat nalunaarutaat

Tupa avatangiisinillu pujortarfiumngitsunik isumannaarineq kiisalu tupanik nioqqusiat nalunaaqutserneqartarneri pillugit Inatsisartut peqqussutaanni nr. 10-mi, 14. november 2004-meersumi § 10 imm. 2 aamma § 14 Inatsisartut peqqussutaanni nr. 6-im 26. maj 2010-meersumi allanngortinnejartoq naapertorlugu makku aalajangersarneqarput:

Atuuffissat

§ 1. Nalunaarut tupanik nioqqusiat Kalaallit Nunaannut tuniniagassatut eqqunneqartut mianersoqqutitaannut atuuppoq.

Nassuaat

§ 2. Nalunaarummi matumani taaguutit ataani taaneqartut ima paasineqassapput:

- 1) "tupat poortat": poortaq imaluuniit tupanik tuniniaanermi poortakkaarlugit tuniniarnejartartuni poorineqartoq sunaluunniit,
- 2) "mianersoqqussut nalinginnaasoq": mianersoqqussut § 3 imm. 1-im taaneqartoq,
- 3) "mianersoqqussut katitaq": mianersoqqussut tassaasoq assiliaq takussutissarluunniit alla oqaatsit mianersoqqussutit tassunga tunngasut ilanngussaq 1-im taaneqartut ilanngullugit.

Mianersoqqussutit oqaasertaat

§ 3. Poortat tupanit nioqqutissanik imaqartut tamarmik mianersoqqussutit nalinginnaasut uku arlaannik oqaasertalernejassapput:

- 1) "Pujortartarneq toqqutaasinnaavoq" imaluuniit
- 2) "Pujortartarneq ilinnut avatangiisinnullu annertuumik ajoqutaavoq",
Imm. 2. Taamaakkaluartoq Imm. 1-im aalajangersagaq tupanut pujuliunngitsunut atuutinngilaq, taakku mianersoqqussummik uannga oqaasertaqassapput: "Tupanit nioqqusiaq manna peqqissutsimut ajoquisiisinnaavoq pinngitsoorsinnaajunnaernermillu kinguneqartarluni".
- Imm. 3.* Imm. 1-im mianersoqqussutit nalinginnaasut taaneqartut tamarmik atorneqassapput akuttunngitsumillu paarlakaattarnissai naqinneqartarnissaallu isumannaarnejassaaq.
- Imm. 4.* Imm. 1-im mianersoqqussutit nalinginnaasut taaneqartut imm. 2-milu mianersoqqussut taaneqartoq poortap sinaanut ersarinnerpaap appaanut naqinneqassaaq.

Imm. 5. Tupanit nioqqusiat poortakkaarlugit tuniniarneqartartuni tuniniaanermi atorneqartumik qalleqqillugit poorneqarsimappata taava mianersoqqussutit imm. 1-imi taaneqartut mianersoqqussut imm. 2-milu taaneqartut poortamut tassunga aamma naqiterneqassapput, tassa poortaq akimut ersinngippat.

§ 4. *Tupanit nioqqusiat poortat tamarmik mianersoqqusummik katitamik ilanngussaq 1-imi nalunaarsukkat akornanneersumik pilerneqassapput.*

Imm. 2. Taamaakkaluartoq Imm. 1-imi aalajangersagaq tupanut pujuliunngitsunut atuutinngilaq.

Imm. 3. Mianersoqqussutit katitigaasut imm. 1-imi taaneqartut tamarmik atorneqassapput akuttunngitsumillu paarlakaattarnissai naqinneqartarnissaallu isumannaarneqassaaq.

Imm. 4. Imm. 1-imi taaneqartut mianersoqqussutit katitigaasut poortukkap sinaani ersarinnerpaat appaannut naqinneqassapput.

Imm. 5. Tupanit nioqqutit poortakkaarlugit tuniniarneqartartuni tuniniaanermi atorneqartumik qalleqqillugit poorneqarsimappata taava mianersoqqussutit imm. 1-imi taaneqartut aamma poorisamut tassunga naqiterneqassapput, tassa poortaq taanna akimut ersinngippat.

Mianersoqqussutit ilusii

§ 5. *Mianersoqqussut nalinginnaasoq § 3 imm. 1-imi taaneqartoq aamma mianersoqqussut § 3 imm. 2-mi (tupa pujuliunngitsoq) taaneqartoq saneqqami pineqartumi qaavata minnerpaamik 32 procentia qallersimassavaa.*

Imm. 2. Mianersoqqussut katitigaasoq § 4 imm. 1-imi taaneqartoq saneqqami pineqartumi qaavata minnerpaamik 45 procentia qallersimassavaa.

Imm. 3. Poortami nioqqutissanut allanut cigarettiunngitsunut atugassaasuni qaavi ersarinnerpaasut 75 cm²-mit anginerusut, mianersoqqussutit § 3 imm. 1-imi aamma § 4 imm. 1-imi taaneqartut qaavata angissusia minnerpaamik 24cm² qallerisimassavaa.

Imm. 4. Poortami nioqqutissanut allanut cigarettiunngitsunut atugassaasuni mianersoqqussutit § 3 imm. 1-imi aamma § 4 imm. 1-imi taaneqartut nipittartoq ilisarnaat atorlugu inissinneqarsinnaapput, ilisarnaatit nipittartut taakku peerneqarsinnaanngippata. Ilisarnaatit aalajangersarneqassapput angissutsit pingasut atorlugit, ilisarnaat sapinngisamik annerpaaq poortamut ataatsimut atorneqarluni. Kalaallit Nunaannut nioqqutissanik eqqussuisoq pisinnaatitaavoq nammineq ilisarnaatit nipitinnissaanut, tamanna niuertarfinnut tuninianningeranni pissappat.

§ 6. *Mianersoqqussutit § 3 imm. 1 aamma § 4 imm. 1 naapertorlugit allassimasussat ima isikkoqassapput:*

1) Ataanut qaqortuusumut naqinnerit Helvetica atorlugu qernertumik, silitumik naqinneqassapput.

2) Naqinnerit angissusaat imaassaaq tassunga allatassat allaffigisassap sapinngisamik annerpaartaa ulikkaassallugu.

3) Naqinnerit mikisut atorlugit, oqaaseqatigiinni naqinneq siulleq kisiat pinnagu oqaasilerinermillu tunngaveqartumik piumasarineqartillugu.

4) Allatassap naqiterneqarfissaata nalaagut qeqqa aallartiffagalugu, poortap qaavata sinaa malillugu.

5) Qernertumik minnerpaamik 3 mm-isut annerpaamillu 4 mm-isut silitsigisumik kaajallallugu sinaakkuserneqassaaq mianersoqqusummik paasissutissamilluunniit arlaannaatigulluunniit

innarliinngitsumik. Sinaakkutaq qernertoq taanna sinaani pineqartumi qaavata minnerpaamik 32 aamma 45 procentianut aammalu qaavata 24 cm²-ianut § 5 imm. 1, 2 aamma 3-mi taaneqartunut ilaatinneqarsinnaavoq.

6) Kalaallisut aamma qallunaatut.

Imm. 2. Imm. 1 nr. 5-imi aalajangersagaq tupanut pujuliunngitsunut atuutinngilaq.

§ 7. Allatat mianersoqqussutit poortukkami akitsuutip allagartaanut naqinneqassangillat.

Imm. 2. Allatat mianersoqqussutit ima naqiterneqassapput peerneqarsinnaajunnaarsillugit piarieqarsinnaajunnaarsillugillu.

Imm. 3. Allatat mianersoqqussutit tarrisineqarsinnaassanngillat, qallerneqarsinnaassanngillat imaluunniit allatanik assinilluunniit allanik akornuserneqarsinnaassanngillat aamma poortap ammarneratigut.

Imm. 4. Tupanit nioqqusiani allani cigarettiunngitsuni allatat nipittartoq ilisarnaat atorlugu inissinneqarsinnaapput, ilisarnaatit nipittartut taakku peerneqarsinnaanngippata.

Pineqaatissiisarnerit

§ 8. Nalunaarummi matumani aalajangersakkanik unioqqutitsinermi akiliisitaasussanngortitsilluni pineqaatissiisoqarsinnaavoq.

Imm. 2. Kalaallit Nunaanni pinerluttulerinermi inatsisini aalajangersakkat naapertorlugit inuk inatsisitigut pisinnaatitaasoq pisussaatitaasorlu akiliisitaasussanngorlugu pineqaatissiisoqarsinnaavoq.

Imm. 3. Akiliisitsinerit imm. 1-2 naapertorlugit aalajangerneqartut Landskassemut nakkartinneqassapput.

Atuutilerfia

§ 9. Nalunaarut atuutilissaq ilisimatitsissuteqarnerani.

§ 10. Nalunaarummi aalajangersakkat tupanik nioqqutinut ulloq 01. 05. 2016 sioqqullugu Kalaallit Nunaannut eqqunneqartunut atuutissanngillat. Augustip aallaqqaataata 2016 kingorna taamaallaat tupanik tuniniaasoqarsinnaavoq nalunaarummi aalajangersakkanik eqquutitsisunik.

§ 11. Nalunaarut atuutinngilaq sumiiffinni danskit-Amerikamiullu illersornissamut sakkutooqarfíni, isumaqatigiíssut 27. april 1951-imeersoq naapertorlugu pilersinneqartuni kingusinnerusukkut allanngortinneqartoq Kalaallit Nunaata illersornissaa pillugu naapertorlugu pilersinneqartuni.

Namminersorlutik Oqartussat, ulloq 10. april 2015

Martha Lund Olsen

/

Julie Præst Wilche

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut